

Parik Iri Shup Douk Pol Nenekap Panam Eshesh Tesalonaika Iri

*Banenyi Baraen Um Enyudok Baraen Pol Narik
Nenekan Nyanak Um Eshesh Tesalonaika Iri*

1:1 Pol nakripesh yopinyi baraen um Iruhin
nini Jisas Kraiss ta hutaumesh

1:2—3:13 Pol nakripesh um yopinyi mour anan
neneken um nataumesh um aria nakri
nunak nutrish

4:1-12 Pol nakripesh um yopihi aih eshesh
ta shugipesheh um shunek Iruhin nunadu-
dareh um

4:13—5:11 Pol nakripesh um ahudok nyumnah
apakin Debeini nutanamori ahi

5:12-28 Nyatuh iri baraen douk eshesh ta
shugipeshen iri

¹ O ipak Iruhin ananish arpesh pape Tesalonaika iri! Eik Pol yani Sailas iri Timoti mape agundok aria yenekumepogu apudok shup ipak. Ipak douk patukur apakin Yain Iruhin nani Debeini Jisas Kraiss aria pape amamip atip iri. Apak makri Iruhin nutaumep meyoah aria ipakiruh aparuh hur wosik.

*Kristen Shape Tesalonaika Iri Shasuhw Iruhin
Ananin Baraen Dodog Shagipeshen*

² Ihih nyumneh apak biom atun apa mape um munek tenkyu um Iruhin um ipak aria mape

menek betenumep. ³ Apak menek beten um apakin Yain Iruhin um, apak apa menek urkwip um agundok ipakin bilip nyepuhur penek yopihi aih um. Aria shopunek um agundok ipak urkwip panawasham um kupaishi arpesih aria ipak douk peyotu dodogowip penek sabainyi yopinyi mour pataurumesh um. Aria shopunek, menek urkum um agundok ipak padukemesh abom um apakin Debeini Jisas Kraisi ta wata nunaki nuraep um. Douk namudok aria ipak douk peyotu dodogowip atip pasah enenyenen amaan aria pupe putrugun-uman. ⁴ O ipak apakish arpesih! Apak madukemesh um Iruhin douk urkum manawashamep abom aria nanagraehap um pupe ananip atip abom.

⁵ Um maresh? Riguk apak biom atun manaku makripep Iruhin ananin yopinyi baraan um, ananin Mishin nyataurumap nyenekap dodogowip abom aria douk makripep ananin baraan. Apak madae mukripep kabi douk baraan meyoh um uwe, uwok. Abudok nyutob apak manaku makripep baraan um, apak madukemesh abom um enyudok baraan douk adurin atin abom. Aria ipak douk patrup aria padukemesh um apak menekeh iri aih um agundok makri mutaurumep um purao Iruhin ananin baraan abom um. ⁶ Aria ipak patrup pagipeshap aria pagipesh Debeini shopunek. Aria ipakish horim shenekap pemnek debeiri eriger. Aria Iruhin ananin Mishin nyataurumep nyenekap panadudareh um Iruhin ananin baraan aria douk pemneken pasuhwen pagipeshen. ⁷ Douk namudok aria ihish-

morim Kristen shape agusudok biagos shokugosi nahobigos Masedonia nyani Akaia iri shatrip shakri ipak penek yopihi aih aria eshesh douk shagipeshep. ⁸ Aria ipak douk pemnek enyudok baraeen um apakin Debeini pasuhwen pagipeshen aria enyen nyarahaen nyeyatagun um agusudok biagos shokugosi nahobigos Masedonia iri Akaia aria shemneken kabi douk nyubrap peyagwreh shemnekap um. Aria enyudok baraeen um agundok ipak pemnek Iruhin ananin baraeen pasuhwen pagipeshen um douk madae nyurahaen Masedonia iri Akaia atin, uwok. Enyen douk nyarahaen ihigunum. Douk namudok aria apak mour wokap um mukripesh um. ⁹ Um maresh? Eshesh kanak shakripap um ehudok yopihi aih riguk ipak penekkeh um pataurum apak biom atun abudok nyutob manaku mani ipak mape um. Aria shopunek, shakripap um agundok ipak pekeshuk agabus warehos shani ihm-morim madae adurimi god omi um uwe aria patanam panak um Iruhin penek ananin mour um. Anan douk adurin abom Iruhin douk nape ihih nyumneh iri. ¹⁰ Aria shopunek, shakripap um agundok pape patru-gun um ananin nuganin Jisas um nukutukuk iruhw heven nunaki um. Seiwok eshesh shan nagok aria Iruhin wata nonohur nakitak nape iri. Anan douk nataurumap narap makutukuk agundok ta Iruhin juwehosin nunekumesh kwot shenek yoweishi inahos iri arpeshep um.

2

Pol Nakri Um Iruhin Ananin Mour Anan

Neneken Tesalonaika Iri

¹ O ipak apakish arpes! Ipak kanak padukemesh um apak manaku makripep Iruhin ananin barae um, apak madae mukripep aria nyunakuk atap meyoh uwe, uwok. Apak makripep aria pasuhwen dodog pagipeshen.

² Aria ipak padukemesh, sagomatin apak marik manak makripesh Iruhin ananin yopinyi barae eshesh Filipai aria eshesh shap shawarugap apa shanumogesh apak aria shenekap memnek debeiri eriger. Aria wata manakumagu ipak um, Iruhin nataurumap nenekap dodogowip aria makripep ananin barae. Sabaishi arpes shakri uwok um apak mukripep enyudok barae um aria eshesh shakri shutapokumap yah. Aria apak madae munogugur uwe.

³ Aria baugos um agundok apak makripep um pukutukuk yoweishi inahos putanamori punak um Iruhin um douk enyudok. Apak douk madae mukri um mugiyagimep uwe, uwok. Aria shopunek, apak madae munek urkwip um munek enesh yoweishi inahos um ipak aria munek rohwumep uwe.

⁴ Apak douk Iruhin kanak natrup nakri wosik um apak munek enyudok mour um muraos ananin barae munak mukrip arpes. Douk namudok aria apak douk manaku makripepen. Aria apak douk madae mukripep barae um munek sabaishi arpes shunadudareh um apak uwe, uwok. Apak makri Iruhin douk nadukemesh nenek skelimap um numun apakip urkwip iri atun nanadudareh-umap.

⁵ Aria apak madae mukri munyubumep uwe. Aria shopunek, apak madae munyubumep apakip urkwip um mukripep enen

baraen um munek nyigiya um ipakish eshudok eneshenesh uwe, uwok. Ipak douk padukemesh um enyudok apakin baraen douk adurin. Aria Iruhin shopunek douk natrup aria nadukemap. ⁶ Apak douk madae munek mour um mukri ipak o enesh kupaishi arpesch shutuk apakish nyeiguhw shuto iruhw uwe, uwok. ⁷ Apak douk Kraiss ananim aposel maraogu ananin baraen manaku makripen. Douk namudok aria apak ta dodogowip um ipak putuk apakish nyeiguhw shuto iruhw. Aria apak manaku mani ipak mapeum, apak makripen shokubur kabi douk onok yopukwi amakek kwataurum okwokwish batowish wosik um. ⁸ Apak urkwip douk panawasham abom ipak aria douk madae mukripen Iruhin ananin yopinyi baraen atin uwe, uwok. Apak shopunek manadudareh mani ipak manoprom mape atugun aria madae mubeshukumep eneh apakih aih uwe, uwok. ⁹ O ipak apakish arpesch! Douk ipak padukemesh um enyudok debeinyi mour apak biom atun meneken iri. Riguk apak manaku mape mani ipak um, apak menek enyudok biyen mour nyumneh weibus. Apak makripen Iruhin ananin yopinyi baraen aria shopunek menek mour um morao utabor um munator apakish eshudok eneshenesh um. Um maresh? Apak makri uwok um mukep amaen um pukop ipakigun worigun um. ¹⁰ Riguk apak douk mani ipak Kristen mape aria ipak pani Iruhin douk padukemap wosik apak. Ipak padukemap um apak douk yopupari munek yopihi atih aih iri. Aria apak baraen madae enen nyupenyap um

munek enesh yoweishi inahos uwe. ¹¹ Aria ipak padukemesh, apak douk mataurum ipak atin atin kabi douk anan yaken nataurum ananish batowish um. ¹² Apak mataurumep um putogur dodogowip um ipakin bilip aria ipakiruh aparuh hur wosik. Aria shopunek, mape um makripep um pupe wosik aria punek yopihi atih aih Iruhin nakriyehi. Anan douk nahwarep um punak puwish agundok anan nape Debeini um ananish arpesk um aria putik agundok anan dodogowin abom atun aria natrugun nyeigur nyato iruh-uman um.

Eshesh Kristen Sheyotu Dodogowish Atish Shosah Eneyenen Amaen

¹³ Riguk apak biom atun manaku makripep Iruhin ananin baraen um, ipak penek urkwip pakri enyudok baraen douk madae enesh arpesk esheshin uwe. Ipak pakri enyen douk Iruhin ananin abom. Aria enyen douk adur. Aria ipak pasuhwen pagipeshen aria enyen nyenek yopinyi mour abom numun ipakiruh aparuh. Douk namudok aria ihih nyumneh apak munek tenkyu um Iruhin um enyudok yopinyi mour ananin baraen nyeneken um ipak iri. ¹⁴ O ipak apakish arpesk! Ipak douk pemnek arudok-mori atur eriger douk Iruhin ananish arpesk douk shatukur Jisas Kraisk shape agudok shokugi nahobig Judia iri shemnegor iri. Eshesh douk Juda eshesh kanak enesh shenekesh eneyenen aria shenekesh shemnek debeiri eriger. Aria ipak shopunek douk pemnek eriger namudok atin. Enesh ipak atubur wabur shakri uwok um ipak pugipesh Kraisk um aria eshesh shenekep

pemnek debeiri eriger. ¹⁵⁻¹⁶ Seiwok eshesh Juda shabo sabaimi profet hagok. Arigaha aria nubokuhien kwar shabo apakin Debeini Jisas nagok. Aria apak biom atun shopunek shakri uwok-umap aria douk shenekap enenyenen aria shahiyahap maruwok manak um kupai-gunum. Apak manak makripesh Iruhin ananin baraen kupaishi arpesh douk madae Juda iri uwe. Apak makri mukripesh um shumneken shugipeshen aria anan nunaraesh shutanamori shupe wosik. Aria eshesh Juda shakri uwok aria shakri shutapok apakih yah um mare munak mukripesh. Namudok aria eshesh shutapok Iruhin ananim urkum aria shatogur ihishmorim arpesh esheshish horim. Riguk eshesh shape shenek sabaishi yoweishi inahos. Aria douk eshesh shatogur sabaishi abom. Aria anan douk juwehosin-umesh aria nakri jurugish. Aria kweipon anan ta nesh.

Pol Nakri Nutanam Nunak Nutik Eshesh Tesalonaika

¹⁷ O ipak apakish arpesh! Enesh arpesh shahiyahapari aria apak biom atun douk makutipukuk banab nyutob manaki mapeik agundok. Apak manaki mape agundok aria apak urkwip porum ipak aria makri abom um munaku mutrip. Aria apak mabirak matik uwok. ¹⁸ Sabaihi nyumneh eik Pol yabirak um yakri apak munaku aria uwok. Yoweini Satan natapokumap yah. ¹⁹⁻²⁰ Apak douk mape munek urkwip um ahudok nyumnah apakin Debeini Jisas Kraisi nunaki aria apak muni ipak mupe wosik ahi. Ahudok nyumnah, apak ta muni

anan mupe atugun aria mupe wosik. Aria douk apak biom atun douk munek urkwip um ipak penek bilip um Krai aria meyotu dodog mape matrugun um Krai nutanamori nunarap um. Aria ahudok nyumnah ta shutik ipak aria ta shudukemesh um apak douk makripep Iruhin ananin baraan aria mabouk yoweishi inahos shabuhuk. Aria apak ta munadudareh um ipak atip aria punekap mutuk Iruhin ananin nyeigur nyuto iruhw.

3

Pol Neshopok Timoti Nanak Um Nutaurum Eshesh Tesalonaika Shuraa Iruhin Ananin Dodog

¹⁻² Apak biom atun munek urkwip um ipak aria manakripam makri ipak ta pupe wosik aka, uwok? Apak makri uwok um mupe mutrugun anah shopunek nyumneh um ipakin baraan nyunakumori apak um, uwok. Douk namudok aria ohwak biohw wapeik agundok Atens aria weshopoku ohwakin wanin Timoti atun nanakumogu nutaurumep. Anan nani ohwak apa manoprom munek Iruhin ananin mour um makripesh Krai ananin yopinyi baraan. Ohwak douk weshopokan nanakumogu nutaurumep um pupe dodogowip um Iruhin aria pusuhw ananin baraan dodog pugipeshen. ³ Um maresh? Ta enesh arpes shunekep purao debeinyi amaen aria pukutukuk Iruhin ananin baraan. Ipak padukemesh, enyudok amaen douk Iruhin kanak nakri wosik aria enyen douk nyatogrumep. ⁴ Riguk apak manaku mani ipak

mape um, abudok nyutob arpesk douk madae shunekap murae enen amaen uwe. Aria apak makripek makri ta mare roubi aria enesh arpesk ta shunek apak muni ipak murae enen amaen. Aria douk ipak padukemesh um apakin baraan douk nyatogur adurin. Eshudok arpesk shenek ipak pani apak morao amaen abom kabi douk riguk apak makripek um. ⁵ Douk namudok aria eik yakri imnek baraan arigas um agundok ipak pape um aria eik douk yeshopok Timoti nanaku. Anan nanakumogu nutrip aria neneki baraan nyunakumori um eik idukemesh um ipak pasuhw Iruhin ananin baraan dodog aka, uwok? Eik yenek urkum yakri um anudok yoweini douk nagraeh arpesk um shenek yoweishi inahos iri ta nukwiraehep aria ta jurug pukutukuk Iruhin ananin baraan aka, mumam? Aria ta wosik atin enyudok riguk apak meneken iri mour um makripek Iruhin ananin baraan um nyunakuk meyoh.

Timoti Nakrip Pol Um Eshesh Tesalonaika Shagipeshen Wosik Iruhin Ananin Baraan Um Aria Pol Nanadudareh

⁶ Aria douk Timoti ta shopunek nakutipukuk nanaki nakripohw yopinyi baraan um ipak. Anan nakri ipak pasuhw Iruhin ananin baraan dodog pagipeshen aria ipak urkwip panawasham ipak kanak pani kupaishi arpesk pataurumesh. Aria ipak urkwip panawasham eik yani Sailas aria pakri punaki putruh abom. Aria ohwak shopunek urkwip panawashamep abom aria wakri unaku utrip abom. ⁷ Ipak

apakish arpush. Sabaishi arpush shape agundok iri shap aria shakop enenyenen amaan aria apak memnek debeiri eriger. Aria apakiruh aparuh madae yoweruh uwe, uwok. Apak memnek um agundok ipak pasuhw Iruhin ananin baraan dodog pagipeshen um aria apak douk meyotu dodogowip atup. ⁸ Apak manadudareh um maresh? Ipak pape dodogowip um Debeini aria pasuhw ananin baraan dodog pagipeshen.

⁹ Aria Iruhin nenekap manadudareh abom um ipak aria apa menek tenkyuman. Aria agundok apak menek tenkyuman um douk debegun abom. ¹⁰ Aria nyumneh weibus apak biom atun urkwip por abom um ipak aria menek beten marig Iruhin um apak munaku mutrip anah shopunek. Aria ta ipak pusuhw Iruhin ananin baraan pugipeshen um, enyen douk wosik. Uwok um, apak makri munaku mutaurumep um pusuwen dodog pugipeshen.

Pol Nenek Beten Narig Iruhin Um Anan Nunak Nutik Eshesh Tesalonaika

¹¹ Eik yakri apakini Yain Iruhin nini Debeini Jisas hutaurumap aria hunekumap anah yah um munaku mutrip. ¹² Aria yakri apakin Debeini nutaurumep aria ipak urkwip panawasham ipak abom atin atin aria punataurum um pishagrakuk abom riguk parik pape peneken um. Aria ipak urkwip panawasham ihishmorim kupaishi arpush shopunek putaurumesh kabi douk ahudok nyumnah apak biom atun urkwip panawasham abom ipak mataurumep

um. ¹³ Aria shopunek yakri apakin Debeini nutauremep nunekep dodogowip numun ipakiruh aparuh aria piyotu dodog. Anan nunekep namudok um hahudok nyumnah apakin Debeini Jisas nini ihishmorim ananish arpesih shunaki ahi, Iruhin apakini Yain ta nutrip aria nukri ipak baraan madae enen nyupenyep uwe aria pape ananip atip.

4

Apak Ta Mugipesh Iruhin Ananim Urkum Um Munekan Nunadudareh

¹ Ipak Kristen ta punnek enyudok eikin nyatuh iri baraan! Um maresh? Apak douk morao Debeini ananit nokwat aria makripep. Eikin baraan douk enyudok. Riguk apak manakumogu ipak aria menek skulumep um ihishmorim yopihi aih um pugipesh aria punek Iruhin nunadudareh. Aria douk ehudok aih ipak douk pape penek. Douk namudok aria apak dodogowip-umeh abom um punek wosik pishagrakuk riguk parik pape penek um. ² Ipak douk mare urkwip pukepukuk um Debeini Jisas ananin baraan douk apak biom atun makripepen iri uwe, uwok. Apak douk anan nakop big um mukripesh ananin baraan aria apak douk makripepen.

³ Iruhin ananim urkum douk namudok. Anan nakri ipak ta pupe ananip atip aria puku-tukuk abom ehudok aih um shenek wehrur um. ⁴⁻⁵ Aria shopunek nakri ipak armam ta pusuhw merik um ipak kanak um mishish mare shikitak puni kupaiwari armago penek wehrur

umbaugenyumdouk amam haiden douk madae hudukemesh um Iruhin iri uwe hape heneken um, uwok. Ipak ta pupe Iruhin ananip atip aria punek yopinyi atin. ⁶ Aria shopunek, nakri ipak armam mare punek eshudok yoweishi inahos um kupaimi Kristen um punatrum amamiyu armago um, uwok. Douk riguk apak makripep dodogowip atup um ehudokmori aih. Um maresh? Apakin Debeini ta nuwanamam eshudokmori yoweishi inahos amam henekesh iri. ⁷ Aria Iruhin douk madae nuhwarap um munek wehrur uwe, uwok. Anan nahwarap um mupe wosik abom aria mupe ananip atup. ⁸ Namudok aria shashudok arpesh douk shukri uwok um shumnek enyudok baraen iri douk madae shukop agabus apak arpesh atup uwe, uwok. Eshesh douk shakon agabus Iruhin douk nakop ananin Mishin iri shopunek.

Apak Ta Urkwip Punawasham Kupaishi Aria Munek Yopihi Aih Shopunek

⁹ Eik douk mour woke um ikripep enen baraen um ipak urkwip punawasham kupaishi Kristen aria punataurum um. Um maresh? Iruhin douk nenek skulumep jurug aria ipak penekesh wosik ehudok aih. ¹⁰ Aria ipak urkwip douk panawasham ihishmorim kupaishi Kristen douk shape ihigunum um shokugi nahobig Masedonia iri. Aria ipak Kristen! Apak makri

baugenyum **4:4-5** um enyudok baraen douk biyen. Enen nyetem lain 4-5, aria enen nyakri ipak armam puni ipakiyu armago punaraum iri ta pugipesh yopihi atih aih.

mukripep dodogowinyi baraeen um ipak urkwip punawasham eshudok arpesk aria putaurumesh pishagrakuk riguk parik pape penekesh um. ¹¹ Aria shopunek, ipak mishish ta shikitak um pupe wosik abom aria mare piyagwreh sabainyi baraeen um puni kupaishi piyagwreh debeg punitok uwe, uwok. Ipak ta punek urkum um ipak kanak aria punek mour um puparug ipakibor utabor buni worigun ipak pugnoh iri kabi douk riguk apak makripepukuk um. ¹² Ipak ta punekesh namudok um kupaishi arpesk douk madae shugipesh Kraisi iri uwe shutrip aria shukri ipak douk yopipari. Aria shopunek um mare puhwar kupaishi um shubiromep, uwok.

Apakin Debeini Jisas Ta Wata Nutanamori

¹³ O ipak apakish arpesk! Apak biom atun makri mukripep enen adurin baraeen um eshudok shagok iri arpesk. Eshudok arpesk douk madae shudukemesh um Iruhin iri uwe douk madae shudukemesh um agundok shagok iri shanak shapeum uwe. Douk namudok aria eshesh urkwip yowep aria shereh shanakwukri shanaruwor. Douk namudok aria apak makri ipak mare pureh kabi eshesh shereh um, uwok. ¹⁴ Um maresh? Apak munek bilip makri Jisas nagok sharuman aria anan wata nakitak nape. Douk namudok aria apak munek bilip makri ahudok nyumnah Jisas nutanamori ahi, Iruhin ta nuhur shagok iri douk riguk shenek bilip um anan iri shukitak shini Jisas shunaki. ¹⁵ Aria enyudok baraeen apakin Debeini nakripapen iri douk enyudok ta mukripepen. Baraeen enyudok.

Kweipon hahudok nyumnah anan nutanamori ahi, eshudok douk wata shupe agundok atap iri ta mare shurik shunak aria shagok iri shugiguk shunak, uwok. ¹⁶ Eshudok douk shape agundok atap iri ta shumnek Debeini nuhwar debeg. Aria enselahos esheshin debeinyi ensel ta nyuhwar debeg aria Iruhin ananihw oruhw ta hwiyyagwreh. Aria apakin Debeini Jisas ta nukutukuk iruhw heven nunaki. Aria eshudok arpesk douk shenek bilip aria shatukur Kraisk iri douk riguk shagok iri ta shurik shukitak shupe. ¹⁷ Aria hahudok nyumnah apak douk munek bilip aria wata mape iri, Iruhin ta nurap muni eshudok shagok iri munak ahudok atuh. Apak ta munak mutik apakin Debeini gani iruhw utag aria muni anan mupe ihih nyumneh. ¹⁸ Douk namudok aria ipak ta punataurum um punakripam enyudok baraan um puhur ipak atin atin ipakiruh aparuh um piyotu dodogowip.

5

Apak Ta Mupe Mutrugun um Apakini Debeini Nutanamori um

¹ O ipak apakish arpesk! Apak biom atun mour wokap um mukripep um meih nyumnah ta enyudok nyutogur um, uwok. ² Um maresh? Ipak padukemesh, ahudok nyumnah apakin Debeini nutanamori nunek skelimum arpesk ahi, anan ta nunaki kabi douk nakwuaruh iri nanaki orokohunib um wab um. ³ Abudok nyutob arpesk ta shukri, "Douk apak mape yopuhi nyumnah aria mape wosik." Aria ahudok nyumnah ta hutogur ahudok atuh kabi armatok

kwomnek eriger um kubuki batowin um. Aria eshesh ta mare shuruwok, uwok. Eshesh ta shurao debeiri eriger aria shupe yowesh abom.

⁴ Aria ipak Kristen douk madae pupe kabi eshesh shape arukwutigun iri shape shenek urkum um uwe. Douk namudok aria ahudok nyumnah ta hutogrumesh ahudok atuh kabi douk nakwuaruh iri nanaki um. Aria eshesh shikitak yowiyokuk. Aria ipak ta uwok. ⁵ Ipak ihishmorim pani apak douk Iruhin ananish batowish douk mape bogaragun-umori. Apak douk madae mupe kabi eshudok douk shape arukwutigun iri shapeum um uwe, uwok. Aria apak madae munek yoweishi inahos kabi eshesh shape arukwutigun iri shenekesh um uwe. ⁶ Douk namudok aria apak ta mare mupe kabi douk sheshuh iri sheshuh um, uwok. Sheshuh iri madae shudukemesh uwe, eshesh shakri uwok um shumnek Iruhin ananin baraden aria shenek yoweishi inahos. Aria apak mare munek yoweishi inahos kabi eshesh um, uwok. Apak ta mupe musuhw merik um apak kanak aria munek urkum um yopinyi atin aria muneken. ⁷ Um maresh? Weibus obi nyutob, sheshuh iri arpeshe sheshuh. Aria shawok abar iri shawok abar aria shagugak. ⁸ Aria apak uwok. Apak douk mape bogaragun iri. Douk namudok aria apak ta musuhw merik um apak kanak aria musuhw Iruhin ananin baraden dodog mugipeshen aria apak urkwip punawasham kupaishi. Aria ta munekesh namudok um, apak ta mupe kabi anan nasuhw aidap nanabeshuk ananihw yegenyihw iri nape wosik abudok

nyutob nunek wanohw um. Aria apak ta mudukemesh abom um Iruhin ta nunarap mutanamori mupe wosik. Aria apak mudukemesh um enyudok um, apak ta mupe wosik kabi anan nowem um ainit hat iri nape wosik abudok nyutob anan nunek wanohw um. ⁹ Iruhin douk madae nugraehap um nuwanamap apakish yoweishi inahos uwe, uwok. Anan douk nagraehap um apakin Debeini Jisas Kraiss nunarap mutanamori mupe wosik atin. ¹⁰ Anan douk nagok um nurao apak ihishmorim munak muni anan mupe wosik atin. Aria ta apak mugok o wata mupe um, anan ta wata nunarap. ¹¹ Douk namudok aria ipak ta piyagwreh punakrip um yopinyi atin baraen um punataurum um piyotu dodogowip kabi douk ipak pape peneken um. ¹²⁻¹³ O ipak apakish arpeshe, apak makri ipak pumnek enyudok apakin baraen pugipeshen. Baraen enyudok. Ipak ta pupe shakamum ipakim debeimi douk henek debeinyi mour um hataurumep hakripep Iruhin ananin baraen iri. Amam douk Iruhin nagraeham um hataurumep aria hunabreshep um punek yopihi atih aih. Amam douk hataurumep wosik. Douk namudok aria ipak ta putuk amamish nyeiguhw shuto iruhw aria ipak urkwip punawashamam aria putaurumam. Aria ipak ta piyagwreh atin baraen aria punagabe um pupe atugun.

¹⁴ Ipak apakish arpeshe! Apak biom atun makri mukripep enen baraen shopunek um pumneken aria pugipeshen. Baraen enyudok. Ipak enesh douk shape meyoh, madae shunek mour atin uwe. Douk namudok aria ipak pukrip eshudok-

mori arpesh um mare shupe meyoh, uwok. Aria shopunek, ipak enesh douk shanogugur. Douk namudok aria ipak pukriresh yopinyi baraeen um pugabe esheshiruh aparuh um eshesh mare shunogugur. Aria shopunek, ipak enesh douk madae dodogowish uwe. Douk namudok aria ipak ta putaurumesh um shutogur dodogowish. Aria putaurum ihishmorim arpesh aria mare juwehosip pukriresh debeg, uwok. Ipak ta pupe samokwiyaishi arpesh aria pukriresh shokubur.

¹⁵ Aria ta enesh arpesh shunek yoweishi inahos um ipak um, ipak mare wata pinyanam-umesh, uwok. Ihih nyumneh ipak ta pukwiraeh um punek yopinyi atin um ipak atin atin puni ihishmorim arpesh shopunek putaurumesh. ¹⁶⁻¹⁷ Aria ipak ta pupe um punadudareh namudok atin aria pupe punek beten nyumnah wab. ¹⁸ Aria ipak ta punek tenkyu um Iruhin um enenyenen nyutogrumep iri. Um maresh? Anan douk nakri ipak patukur Jisas Krai iri ta pupe um punek tenkyuman namudok atin. ¹⁹ Iruhin ananin Mishin douk nyenek sabaihi yopihi atih aih iri mour. Douk namudok aria ipak mare putapok enenyenih yah um nyunek enenyenim mour um, uwok. ²⁰ Aria enyen douk nyohur enesh arpesh aria shakrirep Iruhin ananin baraeen. Douk namudok aria ipak mare pukenyuk agabus enyudok baraeen, uwok. ²¹ Aria ipak ta punek skelimum ihinyumorim baraeen nyuni aih aria pudukemesh um enyen douk yopinyi o yoweinyi. Aria yopinyi um, ipak ta pusuwen dodog. O ta yoweinyi um, ipak ta pukutinyukuk. ²² Aria pukutukuk ihihmori yoweihim aih.

²³ Aria eik yakri Iruhin douk baugos um apakiruh aparuh hur wosik um nunekep pupe ananip atip abom um punek ihihmori yopihi atih aih. Aria shopunek, yakri nutaurumep aria mare enesh yoweishi inahos shupenyep ipakiruh yegeshiweruh huni ipakish mishish shuni ipakiruh aparuh ahudok yopuhi nyumnah apakin Debeini Jisas Kraiss nutanamori ahi aria pupe wosik atin. ²⁴ Aria Iruhin douk nahwarep um pugipesh ananin baraan aria apa nagipeshen wosik ihinyumorim baraan anan nakriyen iri. Namudok aria anan ta nutaurumep pupe wosik arigaha ahudok yopuhi nyumnah Debeini Jisas nutanamori ahi.

²⁵ O ipak apakish arpes! Ipak ta punek beten porik Iruhin um nyutaurumap. ²⁶ Aria ipak ihipmorim ta urkwip punawasham ipak atin atin aria punapuprikum. ²⁷ Aria eik Pol douk apakini Debeini neke debeinyi big. Douk namudok aria eik yakri ikripep um putarih enyudok baraan nyetem apudok shup iri um ihishmorim Kristen shape ganudok iri shumneken. ²⁸ Aria eik yakri apakin Debeini Jisas Kraiss nutaurumep meyoh aria nunekep pupe wosik.

IRUHING ANANIN BARAEN
The New Testament in the Coastal Arapesh dialect of
the Bukiyip language of Papua New Guinea
Nupela Testemen long tokples Coastal Arapesh long
Niugini

copyright © 2003 Wycliffe Bible Translators, Inc.

Language: Coastal Arapesh (Bukiyip)

Dialect: Central

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-05-07

PDF generated using Haiola and XeLaTeX on 21 Feb 2024 from source files dated 31 Aug 2023

d1ef5a4e-3e53-5ef0-80e4-4cd8770ca6e6